



Groupe parlementaire

N° 7136  
Entrée le 08.11.2022  
Déclarée recevable  
Président de la Chambre des Députés  
(s.) Fernand Etgen  
Luxembourg, le 08.11.2022

Här Fernand Etgen  
President vun der Deputéiertechamber  
19, um Krautmaart  
L-1728 Lëtzebuerg

Lëtzebuerg, den 8. November 2022

Här President,

esou wéi d'Chambersreglement et virgesäit, bieden ech lech, dës parlamentaresch Fro un d'Madamm Gesondheitsminister weiderzeleeden.

Esou wéi an engem oppene Bréif vun der Biergerorganisatioun "Fräi Liewen" ervirgeet, gouf bei enger Stéchprouf duerch den LNS (Laboratoire National de Santé) zu de PCR-Tester déi am Kader vum COVID-19 erhuewe goufen, festgestallt, datt bei der Géigeprouf just 15 Prozent vun de positive Resultater konnte confirméiert ginn. Den LNS huet insgesamt 59 Tester iwwerpréift, déi sech op 50 Bierger verdeelt hunn, dëst well fir verschidde Bierger méi ewéi een Test kontrolléiert gouf.

An deem Zesummenhang géif ech der Madamm Gesondheitsminister gär dës Froe stellen:

- 1) Kann d'Madamm Minister eng Tabell presentéieren, déi regroupéiert, wéi vill positiv PCR-Tester zu Lëtzebuerg vum 1. Mäerz 2020 u bis zum Enn vun der 42. Kalennerwoch 2022 gemaach goufen, wéi dacks duerch den LNS eng Géigeprouf geholl gouf a wéi d'Resultater vun dëse Prouwen (positiv, negativ, onbestëmmt asw.) ausgefall sinn?
- 2) Kann d'Madamm Minister matdeelen, ob Leit deenen hire PCR-Test bei der Géigeprouf negativ war heiriwwer informéiert goufen an aus den offizielle Statistiken zu den Infektionszuelen erausgerechent goufen? Falls net, wéi war déi Decisioun motivéiert? Kann d'Madamm dann nodréiglech déi berengegt Statistik presentéieren?
- 3) Kann d'Madamm Minister matdeelen, wéi eng Käschtchen d'Sozialversécherunge fir Bierger iwwerholl hunn, deenen hir Géigeprouf negativ ausgefall a wéi héich de Gesamtmontant vun dëse Käschtchen louch? Falls déi Leit am Hibleck op d'Isolatiounsdauer, de Krankeschäin asw. d'nämmlecht behandelt goufen, wéi wann d'Géigeprouf positiv gewiescht wier, kann d'Madamm Minister da matdeelen, wéi vill Suen hätte kënnen agespuert ginn, wann d'Leit nom zweeten Test als negativ gehandelt gi wieren?
- 4) Kann d'Madamm Minister matdeelen, ob déi Leit, déi no engem positiven Test verstuerwe sinn awer d'Géigeprouf sech als negativ erausgestallt huet, och an der Statistik vun de COVID-Verstuerwene gezielt goufen? Goufen déi Hannerbliwwen heiriwwer informéiert? Falls net, wéi war déi Decisioun motivéiert? Kann d'Madamm Minister nodréiglech déi berengegt Statistik presentéieren?

Mat déiwem Respekt,

Jeff Engelen  
Deputéierten



**Gemeinsam Äntwert vun der Madamm Gesondheitsministesch an vum Här Minister fir sozial Sécherheet op d' parlamentaresch Fro n°7136 vum honorabelen Deputéierten Här Jeff Engelen**

Sait dem ministeriellen Arrêté vum 6. Januar 2021 baséierend um Gesetz vum 1. August 2018 iwwert meldepflichteg Krankheeten, ass den Nationalen Gesondheitslaboratoire (*Laboratoire national de santé – LNS*) ee nationalen Referenzlaboratoire fir akut respiratoresch Infektiounen.

An deem Kontext kritt den LNS all positiv Covid-19 Échantillonen vun den aneren Laboratoire déi medizinesch Analysen maachen zougestallt. Den LNS krut säit dem Januar 2021 esou eng 69'851 Échantillonen iwwermëttelt<sup>1</sup>.

Den eenzegen Optrag deem den LNS am Kader vum Referenzlaboratoire huet besteet doran e Sequençage vun de Viren op enger statistesch signifikanter Unzuel (d.h. nëmmen engem klengen Deel) vun den positiven Échantillonen ze maachen, fir domat den Typ vu Variant feststellen a Statistiken iwwert d' Zirkulatioun vun den Varianten zu Lëtzebuerg z'erstellen an dem Europäeschen Center fir de Contrôle an d'Préventioun vun Infektiounskrankheeten (European Centre for Disease Control and Prevention – ECDC) ze mellen.

Et sief ënnerstrach datt den LNS net den Optrag kritt huet eng diagnostesch « Géigenprouf » ze maachen an d' Aarbecht vun den aneren Laboratoire souzesoen domat ze kontrolléieren. Dëst ass eng falsch Informatioun déi leider nach ëmmer diffuséiert gëtt.

Wat déi sougenannten Statistiken betrëfft déi d' Biergerorganisatioun verbreet, muss e Folgendes soen :

- Et handelt sech heibäi ëm eng ganz geréng Zuel vun ongeféier 50 Tester, aus der een näischt extrapoléieren kann iwwert den Total vun bal 70'000 Échantillonen déi den LNS krut huet.
- Den Detectiounsseuil (d.h. d'Quantitéit vu Virus deem ee brauch fir en Test ze maachen) ass bei der diagnostescher PCR vill méi niddereg wéi beim Sequençage. Et brauch ee wéineg Virus fir eng Infektioun feststellen mat enger PCR, mee et brauch een vill Virus fir e Sequençage ze maachen. Dofir kënne béid Tester net mateneen verglach ginn.
- Well den LNS de Sequençage nëmmen op engem klengen Deel vun den Échantillonen mécht, ass et normal datt ee manner Resultater fir de Sequençage am LNS huet wéi fir d' diagnostesch PCR Tester an den aneren Laboratoire.

Den Séquençage ass deemno keng Géigenprouf fir eng diagnostesch PCR ass sou datt déi vum honorabelen Deputéierten gestallten Froen ouni Objet sinn.

Lëtzebuerg, den 10. Januar 2023

D'Gesondheitsministesch  
(s.) Paulette LENERT

<sup>1</sup> Situatioun op Mëtt Oktober 2022